

23.3 RAPPORT VAN DIE DEPUTATE VIR CJBF, KERKORDE EN EVANGELISERINGSMEDIA (Artt 112, 236)

- A. Dr VE d'Assonville lewer die Rapport.
- B. 'n Eksemplaar van die Calvynkommentaar oor Romeine, vertaal deur prof F Postma, word aan die voorsitter, dr CJ Smit, deur dr GJ Meijer (voorsitter Deputate CJBF) oorhandig.
- C. **Besluit:** Die Rapport word verwys na Kommissie Publikasies en Media.
- D. Ds SP Venter rapporteer namens die Kommissie Publikasies en Media.

E. RAPPORT

1. Formeel

1.1 *Opdrag*

1.1.1 Vgl Acta 2006:755-774.

1.1.2 Meer breedvoerige verwysing na die opdrag volg by die onderskeie onderafdelings hieronder (artt 2-4).

1.2 *Samestelling en funksionering van die Deputate*

1.2.1 Die Deputate het op 23 Februarie 2006 in Potchefstroom gekonstitueer.

1.2.2 Dr FW Leuschner (GK Wapadrant), wat deur die Sinode as skriba van die Deputate aangewys is, het per e-pos laat weet dat hy nie beskikbaar is vir die Deputaatskap nie. Die Deputate het daarvan kennis geneem en besluit om so aan die Sinode te rapporteer.

1.2.3 Omdat dit vir ds IW Ferreira (GK Rietvallei), wat genader is om in die plek van dr Leuschner te dien (met die oog op die Evangeliseringsmedia), nie moontlik was nie, is br JM Earle (GK Rietvallei) genader en het hy hom bereid verklaar.

1.2.4 Weens die feit dat dr Leuschner dus ook nie as skriba vir die Deputate beskikbaar was nie, is ds WJ Botha versoek om as skriba van die Deputate op te tree. Nadat lg op sy beurt weens omstandighede 'n aantal vergaderings nie kon bywoon nie, is dr VE d'Assonville op 12.10.2006 eers tydelik, maar sedert 20.09.2007 permanent as skriba van die Deputate aangewys.

1.2.5 Weens die waardevolle kundige advies wat prof DF du Plessis (GK Alkantrant) as kommunikasiewetenskaplike (UNISA) op deurlopende basis aan die Deputate gelewer het, wil die Deputate aanbeveel dat prof Du Plessis in die toekoms ook as een van die adviseurs van hierdie Deputate, benewens proff GJC Jordaan en CFC Coetzee, benoem sal word.

1.2.6 Die Deputate het gepoog om ongeveer elke kwartaal te vergader; vergaderings het volgens afspraak meestal in Potchefstroom, enkele kere in Pretoria en een maal in Boksburg plaasgevind. Daarbenewens het Kommissies van die Deputate na behoefte vergader om opdragte af te handel.

1.3 *Fondse*

1.3.1 Tydens elke vergadering is daar oor die stand van die onderskeie fondse gerapporteer.

1.3.2 Die finansiële state van die onderskeie fondse word ingesluit by die ander state wat deur die Administratiewe Buro bestuur word.

Besluit: Kennis geneem van 1.1 tot 1.3.2.

2. CALVYN-JUBILEUMBOEKEFONDS [CJBF]

2.1 *Opdrag* – vgl Acta 2006:755-763,772-774; vgl verder die Reglement van die CJBF (Acta 1982:226-227).

2.1.1 Die opdrag sluit in dat toekomstige publikasies binne die raamwerk van die doelstellings van die CJBF oorweeg, gekeur en uitgegee word.

2.1.2 Die redaksie, uitgee, druk en prysvasstelling van die 2000-Psalmbboek se hersiene uitgawe vorm deel van die opdrag van hierdie Deputate.

2.1.3 Die beheer van boekevoorrade van die CJBF asook die beheer oor die CJBF- en Totiusfondse berus by hierdie Deputate; die administrasie daarvan word deur die Administratiewe Buro behartig.

2.2 *Vorrade: CJBF*

Vgl Aanvullende Rapport.

2.3 *Individuele projekte van die CJBF in die termyn 2006-2009*

2.3.1 Psalmboek

2.3.1.1 Publikasie van die 6de Hersiene Uitgawe van die Psalmboek (2000-Psalmboek)

2.3.1.1.1 Die teksgedeelte van die Psalmboek is deeglik hersien – druk- en ander teksfoute, waaronder ook toepaslike regstellings/korreksies aan die Kerkorde op grond van relevante Sinodebesluite, is aan die hand van die oorspronklik bronne/meester vasgestel en gekorrigeer.

2.3.1.1.2 Aandag is gegee aan die totale bladspieël – musieknotasie en melodieë ingesluit – omdat die 2000-Psalmboek nog nie vantevore vanaf die nuwe elektroniese meester gedruk is nie. Daarby is Geneefse melodieë wat met vroeëre uitgawes uitgeval het, weer ingevoeg. (Vgl die Aanvullende Rapport oor die afhandeling van hierdie redaksionele werksaamhede.)

Besluit: Kennis geneem van 2.1 tot 2.3.1.1.2.

2.3.1.1.3 Met die uitsondering van die finalisering van die musieknotasie wat deur prof Colin Campbell in opdrag van Lux Verbi gedoen word, is die meester van hierdie publikasie reeds afgehandel. Die oogmerk is dat die druk so spoedig moontlik sal plaasvind, veral weens die hoë aanvraag vir die Psalmboek. (Vgl die Aanvullende Rapport.)

2.3.1.2 2003-Psalmboek

2.3.1.2.1 Ofskoon hierdie Deputate nie verantwoordelik was vir die uitgee van die 2003-Psalmboek nie, is vasgestel dat daar tydens hierdie termyn nog genoeg voorraad van die 2003-Psalmboek beskikbaar is.

2.3.1.2.2 Die hersiene meester vir die 2000-Psalmboek sal in die toekoms ook as meester vir die gemeenskaplike dele van die 2003-Psalmboek geld.

2.3.1.3 Grootdruk Psalmboek (2000-Psalmboek)

Aan die aanvraag vir Grootdruk Psalmboeke (2000-Psalmboek), soos vasgestel deur hierdie Deputate, word aandag gegee sodra die redaksionele hersiening van die 2000-Psalmboek afgehandel is. (Vgl die Aanvullende Rapport.)

2.3.1.4 Elektroniese weergawe van die Psalmboek vir gebruik in kerke

2.3.1.4.1 Na aanleiding van 'n behoefte wat deur 'n gemeente in 'n navraag gestel is, naamlik 'n versoek dat musieknote/ notebalke vir elektroniese gebruik saam met die Psalmteks beskikbaar gestel moet word, is verskillende aspekte daarvan deur die Deputate hanteer. Grondliggend hieraan is die oordeel van die Deputate dat die CJBF sowel die elektroniese asook die gedrukte media meer moet ontgin.
Motivering: Die tegnologiese ontwikkeling het moontlik tot gevolg dat lidmate Psalmboeke nie meer optimaal benut nie; kennis van onder andere die belydenisskrifte gaan tot niet. Hiermee hang die relatiewe nuwe verskynsel van 'n elektroniese weergawe van die Psalmboek saam sowel as die vraag hoe om 'n leeskuilte onder lidmate te bevorder. Sonder dat daar veralgemeen word, bestaan die indruk dat sommige lidmate nie eintlik meer lees of nie genoeg lees nie.

2.3.1.4.1.1 Die Deputate het daarom ondersoek gedoen oor die beskikbaarstelling van 'n werkbare, professionele elektroniese weergawe van die Psalmboek vir gebruik in gemeentes, veral wat die byvoeging van musieknotasie betref.

2.3.1.4.1.2 Aan gemeentes moet riglyne gebied word oor moontlikhede in hierdie opsig.

2.3.1.4.1.3 Nogtans moet die persoonlike besit van Psalmboeke deur elke lidmaat, ook ter wille van die res van die inhoud (Belydenisse, Formuliere ens) en vir huissamesang (huisgodsdienste) sowel as die benutting daarvan met Kategismuspreke (KO, art 68) aangemoedig en bevorder word.

- 2.3.1.4.1.4 Bepaalde riglyne is reeds vasgestel en ook bepaalde stappe in die proses om hierdie saak te ondersoek (bv gesprekke met betrokke uitgewers en/of ander kerkgroeperinge wat dalk ook geïnteresseerd sal wees), is reeds getref. Die volledige saak is egter nie afgehandel nie, daarom beveel die Deputate aan dat Sinode 2009 hierdie saak as opdrag vir die volgende Deputate laat kontinueer, met inagnome van betrokke finansiële en juridiese aspekte sowel as van die werk wat reeds in hierdie verband gedoen is. (Vgl ook die Aanvullende Rapport.)
- 2.3.1.4.2 Numering/rubrisering van Skrifberymings. Die vraag het na vore gekom, hoe die verskil in die 2003-Psalmbboek se numering van Skrifberymings (w.o. die rubrisering daarvan) met dié van die 2000-Psalmbboek aangespreek sal word. Die Deputate het vasgestel dat die Sinode reeds daarvoor gehandel het (vgl Sinodebesluite, Handeling 2003:668, 3.2.2; Handeling 2006:609-610, 4.1.3; vgl ook hierdie Deputate se Notule 28-02-2008, 7.1.4.2.2.2) – die bestaande besluit van 2003 geld dus (vgl veral Handeling 2003:668, 3.2.2.2), naamlik: “Dat die huidige numering van Skrifberymings behou word en nuwe berymings aan die einde bygevoeg word.”
- 2.3.1.4.3 Ter wille daarvan dat die verwarring tussen die twee stelle nommers van Skrifberymings tans in gebruik nogtans so sinvol as moontlik aangespreek kan word, het die Deputate besluit om ’n indeks beskikbaar te stel met kruisverwysings na beide stelle nommers (2000-Psalmbboek en 2003-Psalmbboek) in beide rigtings. Hierdie indeks gaan in die vorm van ’n gelamineerde boekmerkie saamgestel word, wat saam met alle nuwe Psalmbboeke wat verkoop word maar ook afsonderlik by die Administratiewe Buro beskikbaar sal wees. Die boekmerkie sal die grootte van ’n Psalmbboek wees om mooi daarin te pas. (Vgl die Aanvullende Rapport.)
- 2.3.1.4.4 Die Deputate wil die gebruik van die Psalmbboeke deur kategete en katkisante in die onderrig en toeëiening van die Belydenisskrifte aanmoedig. Dit hou in dat aandag gegee moet word aan die moontlikheid dat katkisante, bo en behalwe die normale kurrikulum wat gevolg moet word, ook weer (meer) Psalms en Skrifberymings uit die hoof sal leer asook dat die Belydenisskrifte vanuit die Psalmbboeke onderrig sal word. Hierdie saak word ook as aanbeveling aan die Sinode deurgegee. In hierdie verband is met die Katkisasiedeputate gekorrespondeer en is hulle versoek om dit op te volg. Hulle het onderneem om dit aan die volgende Katkisasiedeputate wat benoem sal word, deur te gee. Hulle is ook versoek om dit in hulle Aanvullende Rapport op te neem.
- 2.3.1.4.5 In aansluiting by die vorige punt (2.3.1.4.4) het die vraag ontstaan of daar nie meer materiaal is wat elektronies aan lidmate deurgegee kan word nie, bv katkisasiehandleidings ens. Omdat nie alle lidmate oor rekenaars beskik nie, is hierdie saak tipies iets wat gelyklopend met die konvensionele verspreiding van tekste/materiaal kan plaasvind.
- 2.3.1.4.6 In die lig van bostaande is daar verder ’n ondersoek ingestel oor die moontlikheid van ’n selfoondiens met Bybel- en Psalmbboektekste. Op grond van hierdie ondersoek oordeel die Deputate dat ’n volhoubare projek van hierdie aard met die tegnologie wat voortdurend verander, nie koste-effektief gaan wees nie. Daar is dus afgestap van hierdie saak.

Besluit: Kennis geneem van 2.3.1.1.3 tot 2.3.1.4.6.

2.3.2 Institusie van Calvyn in Afrikaans

2.3.2.1 1559-Institusie – Simpsonvertaling

- 2.3.2.1.1 In die uitvoering van die opdrag om die Afrikaanse vertaling van die 1559-Calvyn *Institusie* deur wyle prof HW Simpson weer te publiseer (Acta Sinode 2006:762, 2.10.4), is verskillende stappe deur die Deputate geneem.
- 2.3.2.1.2 Die Deputate het besluit dat die *Institusie* in gedrukte sowel as elektroniese formaat uitgegee sal word.

- 2.3.2.1.3 Vir die finale samestelling van die indeks wat saam met die vertaling gepubliseer gaan word, word dankbaar gebruik gemaak van die kostelike werk wat wyle br Enne Nieuwenhuis (GK Kandelaar) reeds gedoen het in die voorbereiding van 'n onderwerps-/tema-indeks.
- 2.3.2.1.4 Verskillende kwotasies is verkry vir die publikasie en ook die moontlikheid van samewerking met 'n kommersiële uitgewershuis is ondersoek.
- 2.3.2.1.5 Die Deputate het besluit om die *Institusie* saam met die *Instituut vir Klassieke en Reformatoriese Studies* uit te gee. Laasgenoemde stel sy infrastruktuur en kundigheid beskikbaar en aanvaar verantwoordelikheid vir die redaksionele werk aan die uitgawe (w.o. die indeks).
- 2.3.2.1.6 'n Bedrag van R150 000 uit die CJBF-fonds is reeds geormerk vir die publikasie van die *Institusie*.
- 2.3.2.1.7 Met die heruitgee van die *Institusie* sal met die Simpson-familie 'n kontrak gesluit word waarin die tantieme-reëlings getref word.
- 2.3.2.1.8 Die Deputate het die aanbod van die familie van wyle prof Simpson se volle ondersteuning in hierdie projek dankbaar aangeneem.
- 2.3.2.1.9 Ná die verkryging van die elektroniese weergawe van die *Institusie* deur die bemiddeling van br Werner Simpson, is met lg se hulp ook 'n firma in die VSA opgespoor wat in staat is om die destydse XYWrite-formaat in 'n huidige hanteerbare woordverwerkingsformaat (bv MSWord) om te sit. Daar het egter nuwe tegniese probleme opgeduik wat by die opstel van hierdie Rapport nog hanteer word. In die Aanvullende Rapport sal verder gerapporteer word.
- 2.3.2.1.10 Die teikendatum vir die publikasie van die *Institusie* se Simpson/vertaling word is 2009, om saam te val met die 500-jarige herdenking van Calvyn se geboortejaar en die 100-jarige bestaan van die CJBF.

Besluit: Kennis geneem van 2.3.2 tot 2.3.2.1.10. Die Sinode spreek sy hartlike dank uit teenoor die Simpson-familie wat toestemming gegee het om die Afrikaanse uitgawe van die *Institusie* weer uit te gee.

- 2.3.2.2 Afrikaanse verkorte weergawe van die *Institusie* – Duvenage/LJ du Plessis-uitgawe
- 2.3.2.2.1 Weens die aanvraag vir hierdie Afrikaanse uitgawe van die verkorte *Institusie* het die Deputate die manuskrip weer laat oortik met die oog op die publikasie daarvan. Die aanvanklike poging om die vorige druk in te skandeer, is weens tegniese redes laat vaar.
- 2.3.2.2.2 Ná oorweging van verskillende moontlikhede het die Deputate verder besluit om aan 'n taalkundige die opdrag te gee vir die taalkundige verwerking van die manuskrip ter wille van die eietydse leser.
- 2.3.2.2.3 'n Voorwoord vir die nuwe uitgawe is geskryf en ten tyde van die opstel van hierdie Rapport is die uitgawe in die finale proses om gereed gemaak te word vir publikasie. (Vgl die Aanvullende Rapport.)
- 2.3.2.2.4 'n Aansoek om toestemming vir die elektroniese publikasie van hierdie *Institusie*-weergawe op 'n musiek-CD is goedgekeur, maar sal eers tot uitvoering gebring word ná die afhandeling van die taalkundige verwerking van die manuskrip.

Besluit: Kennis geneem van 2.3.2.2.1 tot 2.3.2.2.4.

2.3.3 *The Dawn of a New Light – Life Story of John Calvin* deur Jansie van der Walt

- 2.3.3.1 Hierdie Engelse vertaling deur Jansie van der Walt van haar Afrikaanse historiese roman, *Johannes Calvin – 'n Jeugroman* (1981 gepubliseer deur die CJBF), is in 2008 met 'n eerste oplaag van 500 eksemplare deur die CJBF uitgegee. 'n Ooreenkoms is met die skryfster gesluit, waarvolgens sy die gebruikelike tantieme sowel as 'n aantal persoonlike eksemplare ontvang.
- 2.3.3.2 Omdat die Afrikaanse weergawe van hierdie roman uitverkoop is, het die CJBF besluit om ook dit weer uit te gee – hierdie proses is ten tye van die skryf van hierdie Rapport nog aan die gang. Die manuskrip is reeds getik. (Kyk Aanvullende Rapport.)

- 2.3.4 Die Woord voor die ja-woord, Afrikaanse vertaling van ds E Brink se boek, *Het Woord vooraf*
- 2.3.4.1 Die CJBF het besluit om *Die Woord voor die ja-woord*, Afrikaanse vertaling van ds E Brink (Nederland) se boek *Het Woord vooraf*, te publiseer. Hierdie boek is al in verskillende tale vertaal en positief in die gereformeerde wêreld ontvang. Dit word veral op drie teikengroepe gerig: 1) Belydeniskatgisante; 2) volwasse kategeese/onderrig; 3) vir selflees deur lidmate met die oog op geloofsverryking en groei in geloofskennis.
- 2.3.4.2 Met die ruim hulp deur predikante en lidmate van die VGKSA (Vrye Gereformeerde Kerke in Suid-Afrika) is die manuskrip van die Afrikaanse vertaling van hierdie wêreldwyd gewaardeerde boek sodanig voorberei, dat die proses om dit deur die CJBF te laat uitgee in sy finale fase is. (Kyk Aanvullende Rapport.)
- 2.3.5 Preekbundel deur die 1982-jaargroep van die finale-jaarstudente aan die TSP (*Spreek met aandag en ontsag – onder redaksie van prof GJC Jordaan*)
'n Oplaag van 600 is gedruk en uitgegee. 'n Ooreenkoms is met die redaksie gesluit, waarvolgens die aantal persoonlike eksemplare aan die skrywers vasgestel is.
- 2.3.6 *So bely en leef ons*, publikasie met dagstukkies oor Belydenisskrifte, oorspronklik gepubliseer in die 2005-Almanak
- 2.3.6.1 Op aanvraag – weens positiewe terugvoering oor die dagstukkies – en op versoek van die Deputate Almanak het die CJBF besluit om die dagstukkies oor die Belydenisskrifte, wat oorspronklik in die 2005-Almanak verskyn het, as afsonderlike publikasie uit te gee.
- 2.3.6.2 'n Gepaste titel (*So bely en leef ons*) is gekies, 'n voorwoord is laat skryf en die nodige redaksionele werk is vir die voorbereiding van die publikasie gedoen.
- 2.3.6.3 Ten tye van die skrywe van die Rapport word die moontlikheid nog ondersoek dat die Deputate Almanak fondse beskikbaar stel vir die publikasie. (Vgl Aanvullende Rapport.)
- 2.3.7 Projek “Leer my Heer” om die sing van Psalms en die Geneefse melodieë, veral onder kinders te bevorder
- 2.3.7.1 'n Voorlegging van sr H Weyers is aanvaar vir 'n loodsprojek om deur middel van 'n DVD en met gebruikmaking van karaoke-tegnieke die sing van Psalms en die Geneefse melodieë te bevorder, veral onder kinders.
- 2.3.7.2 In hierdie projek geniet veral pedagogiese maar ook musikologiese beginsels voorkeur.
- 2.3.7.3 'n Professionele musikus is as projekteier gevind; die uitvoering van die projek word deurentyd deur kundige adviseurs begelei.
- 2.3.7.4 Omdat die projek die Psalmsang bevorder, word dit uit die Totiusfonds gefinansier. 'n Bedrag van R100 000 vir die loodsprojek is reeds goedgekeur. Verdere aanbevelings deur die projekteier word ná die eerste fase van die projek ingewag – vgl 2.3.7.6 hieronder. (Vgl die Aanvullende Rapport.)
- 2.3.7.5 Die projek word in ooreenstemming met die redaksionele werk wat aan die Psalmboek gedoen word, uitgevoer, sodat daar nie diskrepansie tussen die musieknotasie in die Psalmboek en die uitvoering van die Psalms in die projek sal wees nie.
- 2.3.7.6 Ten tye van die skryf van die Rapport is die eerste fase van die projek nog aan die gang. (Vgl die Aanvullende Rapport.)
- 2.3.8 Publikasie van die Afrikaanse vertaling van *Calvyn se Kommentaar op Romeine*
- 2.3.8.1 Die CJBF het 'n aanbod van die IKRS (*Instituut vir Klassieke en Reformatoriese Studies*) aanvaar om as mede-uitgewer van die Afrikaanse vertaling van Calvyn se Romeinekommentaar deur prof S (Fanus) Postma op te tree.
- 2.3.8.2 Die betrokkenheid van die CJBF by hierdie projek is direk ooreenkomstig die doelstellings van die CJBF.
- 2.3.8.3 'n Kontrak waarin die onderskeie aspekte in hierdie uitgewersamewerking tot uitdrukking kom, is opgestel en met die IKRS gesluit.

2.3.8.4 'n Eerste oplaag van 1000 eksimplare is gedruk, waarvan die CJBF die helfte vanuit die Admin Buro sal bemark.

Besluit: Kennis geneem van 2.3.3 tot 2.3.8.4.

2.4 *Verdere beoogde projekte*

Die volgende projekte is tans nog in die proses van keuring of afronding met die oog op die keuringsproses:

2.4.1 'n Uiteensetting van die Dordtse Leerreëls.

2.4.2 'n Publikasie oor die geskiedenis van GKSA-gemeentes en hulle kerkgebou

Besluit: Kennis geneem van 2.4 tot 2.4.2.

2.5 *Elektroniese publikasies*

2.5.1 Die Deputate het besluit op die volgende riglyne vir die elektroniese produksie van CJBF-publikasies/-manuskripte/-tekste:

2.5.1.1 Tekste wat aangebied word of hulle aandien om (uitsluitend) elektronies versprei te word, gaan deur die normale keuringsproses wat vir gewone publikasies geld.

2.5.1.2 Die Deputate moet rekening hou met die feit dat die elektroniese beskikbaarstelling van bestaande en toekomstige manuskripte moontlik 'n invloed mag hê op die verkope van die harde kopie (gedrukte publikasies).

2.5.1.3 Gedrukte publikasies moet ná 'n periode of andersins sodra daar 'n behoefte bestaan, elektronies beskikbaar gestel word.

2.5.1.4 Oor die sagteware-formaat waarin goedgekeurde manuskripte gepubliseer word, sal telkens ad hoc geoordeel word.

2.5.1.5 Publikasies kan ook op laserskyf gestoor en versprei word. Die koste vir hierdie medium sal dan soortgelyk aan die heersende mark wees

Besluit: Kennis geneem van 2.5.1 tot 2.5.1.5.

2.5.2 Die Deputate beveel by die Sinode aan dat personeel en ander hulpmiddels beskikbaar gestel word om hierdie en moontlike ander projekte vanaf die Administratiewe Buro te hanteer. Samewerking met die Internet-deputate van die GKSA word uiteraard geïmpliseer.

Besluit: Kennis geneem. Die Sinode beveel aan dat die Deputate CJBF en Deputate Internet met die Bestuur van die Administratiewe Buro oor die behoefte aan hulp sal konsulteer.

2.5.3 Die Deputate het besluit om 'n drukker te koop word waarop die etikette direk op laserskyf gedruk kan word. Die drukker sal by die Administratiewe Buro vir die bestellings en verspreiding van die elektroniese publikasies tot beskikking wees.

2.5.4 'n Versoek dat *Die Gesonde Leer* deur prof PJ de Bruyn, wat destyds deur die CJBF uitgegee is, elektronies op *E-Sword* beskikbaar gestel word, is goedgekeur.

Besluit: Kennis geneem van 2.5.3 en 2.5.4.

2.6 *Bemaking*

2.6.1 Met 'n plakkaat wat aan gemeentes gestuur is, is CJBF-publikasies bemark.

2.6.2 Gedurende die afgelope termyn is breedvoerig aandag aan die vraag oor bemaking geskenk. Verskillende besluite is in hierdie verband geneem, wat ten tye van die skrywe van hierdie Rapport nog tot uitvoering gebring moet word.

2.6.3 Daar is besluit dat alle CJBF-publikasies en -projekte bekend gestel moet word in soveel as moontlik kerklike en teologiese tydskrifte binnelands sowel as buitelandse (bv Nederland).

2.6.4 Die Deputate het kennis geneem van die moontlike realisering van 'n aanbeveling deur die Deputate Kerklike Tydskrifte, dat daar 'n persoon sal wees wat alle kerklike publikasies bemark; vanaf hierdie Deputate se kant word hierdie saak ook aan die Sinode aanbeveel.

2.6.5 Die nuwe CJBF-publikasies gaan in die gemeentes en elders bekendgestel word. Hierdie publikasies word verbind aan verskillende jubileumgeleenthede in 2009 (die 500-jarige herdenking van Calvyn se geboortejaar, die 150-jarige herdenking van die GKSA asook die 100-jarige bestaan van die CJBF) en word as CJBF-bydraes tot hierdie jubileumgeleenthede bemark:

- (a) die heruitgawe van die Afrikaanse (Simpson-)vertaling van Calvyn se 1559-*Institusie*;
- (b) die heruitgawe van die Duvenage/LJ du Plessis-vertaling/-opsomming van Calvyn se *Institusie*;
- (c) die CD/DVD-projek met Geneefse melodieë (in aansluiting by 1509; 1859; 1909) – *Totiusfonds*;
- (d) die publikasie van die Engelse vertaling van Jansie van der Walt se historiese roman oor Calvyn;
- (e) die heruitgawe van die Afrikaanse weergawe van Jansie van der Walt se historiese roman oor Calvyn;
- (f) 'n gesamentlike publikasie (saam met die *Instituut vir Klassieke en Reformatoriese Studies*) van die eerste Afrikaanse uitgawe van Calvyn se Romeinekommentaar;
- (g) die publikasie van die Afrikaanse vertaling van ds E Brink se boek vir volwasse kategese (*Die Woord voor die ja-woord*);
- (h) 'n beoogde historiese publikasie oor die geskiedenis van GKSA-gemeentes en hulle kerkgeboue;
- (i) 'n beoogde publikasie oor die Dordtse Leerreëls.

2.7 Preekbundels

Riglyne vir preke is vereenvoudig en word aan kerkrade uitgestuur, met die oog op die indiening van preekbundels vir publikasie

2.8 Ander aansoeke

2.8.1 Twee manuskripte wat vir oorweging ingedien is, het volgens keurders en die Deputate nie ingepas in die mark waarop die CJBF fokus of binne die raamwerk en doelstellings van die CJBF nie, en is dus nie vir publikasie aanvaar nie.

2.8.2 'n Ander manuskrip wat aanvanklik in die Administratiewe Buro beskikbaar sou wees op aanvraag, is deur die samesteller weer teruggetrek.

Besluit: Kennis geneem van 2.6 tot 2.8.

3. KERKORDE

3.1 *Opdrag* – vgl Acta 2006:763-765,771,772,774

3.2 *Engelse vertaling van die KO met Bylaes*

3.2.1 Die taak is afgehandel, behalwe vir geringe redigeringswerk wat nog gedoen word.

3.2.2 Vir die finalisering en finale publikasie van die Bylaes moet gewag word tot 2009 se Sinode, omdat daar oor sekere sake uitsluitel gekry moet word.

3.2.3 Die weergawe van die Engelse vertaling wat in 2008 op die GKSA-webwerf beskikbaar gemaak is, moet nog geredigeer word.

3.3 *Verklarende woordelys by die Kerkorde*

3.3.1 Daar moet met die finale afhandeling en publikasie van die Afrikaanse “Verklarende woordelys” tot 2009 se Sinode gewag word.

3.3.2 Daar moet met die finale afhandeling en publikasie van die verklarende woordelys tot die Engelse KO eweneens gewag word tot ná 2009 se Sinode.

3.4 *Wysigings aan die Kerkorde*

3.4.1 Publikasie van veranderinge aan die Kerkorde

Weens verskillende aspekte waaroor nog uitsluitel verkry moet word, moet daar met die publikasie van die veranderinge aan die Kerkorde ook gewag word tot tot ná 2009 se Sinode.

3.4.2 Die Handeling Sinode 2006 is nagegaan om vas te stel watter besluite almal op die redigering van die Kerkorde enige betrekking het.

3.4.3 Kennisgewing aan kerke: Aan die kerke is 'n brief oor die wysigings in die KO asook oor die publikasie van wysigings uitgestuur.

3.5 *Indeksing van Sinodebesluite*

Saak kontinueer in oorleg met TSP.

Besluit: Kennis geneem van 3.1 tot 3.5.

3.6 *Kontinuering van redaksionele werk aan die Kerkorde*

Die volgende Deputate (2009) moet opdrag ontvang om die werk aan 3.2-3.5 (hierbo) te kontinueer.

Besluit: Kennis geneem. Die Sinode gee aan die Deputate opdrag om die werk te kontinueer.

4. EVANGELISERINGSMEDIA

4.1 *Opdrag – vgl Acta 2006:765-772,774*

4.2 *Meesterlêer*

4.2.1 By die gebrek aan 'n meesterlêer (harde kopie/elektroniese kopie) waarin alle dokumente/ publikasies vir evangelisering met 'n omvattende indeks vervat is, het die Deputate ondersoek ingestel na die skep van 'n webwerf wat as meesterlêer dien asook na die skryf van CD's en/of DVD's indien nodig om dit by die Administratiewe Buro te stoor. In hierdie ondersoek is aandag gegee aan die ontwerp van 'n webwerf, die aanstel van 'n webmeester wat alle lektuur en gegewens met betrekking tot die CJBF, evangelisasie en hospitaallektuur op die webwerf laai en instandhou, asook 'n maandelikse toelae om die webwerf in stand te hou vir die sistematiese ontsluiting van publikasies.

4.2.2 'n Webwerf vir die Deputate Publikasies is in hierdie verband ontwerp. Onder meer sal dit 'n sesmaandelikse omvattende indeks aan Kerkrade insluit, asook die beskikbaarstelling van nuwe literatuur, die benutting van die Internet as verspreidingsnetwerk en die toeganklikheid tot sulke literatuur deur middel van CD's en/of ander elektroniese hulpmiddels. Hierdie ontwerpte webwerf is by www.gksa.org.za/cjbf en sal gereeld op datum gehou word.

4.2.3 Ds Hennie van Wyk het hulp gebied met die tegniese aspekte hierin.

4.2.4 Op die webwerf is 'n toepaslike skakel na die *Quo Vadis*-uitgawes (sien 4.3 hieronder) aangebring, asook skakels na 'n oorsig oor die ontstaan en geskiedenis van die CJBF, die Kerkorde in Afrikaans en Engels, die Keuringsreglement vir Evangelisasielektuur, evangelisasiemedia; hospitaallektuur; *Quo Vadis*-uitgawes, ander literatuur, kontakmoontlikhede met die deputate met die nodige telefoonnommers, ens.

4.2.5 Ten opsigte van die bemerking van bg materiaal word geoordeel om gegewens gereeld per e-pos aan die kerke deur te gee. Dit gaan oor die benutting van die Internet as verspreidingsnetwerk: Deur die webwerf lewendig te hou, kan literatuur voortdurend elektronies beskikbaar gestel word.

4.2.6 Sodra die Deputate die webwerf goedgekeur het, sal die verbinding met GKSA-webwerf geskep word.

4.2.7 Daar word aandag gegee aan verbindingsskakels met die webwerwe van buitelandse kerke.

4.2.8 Daar is besluit dat die webmeester se honorarium uit die Evangeliseringsmediafonds betaal sal word. Die Deputate moet hierdie honorarium nog vasstel ná 'n beoordeling van die werk wat reeds gedoen is.

Besluit: Kennis geneem van 4.1 tot 4.2.8. Kerke se aandag word gevestig op die groot aantal Evangeliseringsmateriaal op die Webwerf beskikbaar. Besoek – www.gksa.org.za/cjbf

4.3 *Quo Vadis*

4.3.1 'n Ondersoek is gedoen na die moontlikhede van die ontginning en ontsluiting van vroeëre *Quo Vadis*-uitgawes.

4.3.2 In die Deputate se werk aan hierdie saak is gebruikgemaak van die indeks van *Quo Vadis*-uitgawes wat op die databasis van die Noord-Wes Universiteit is.

4.3.3 'n Aantal *Quo Vadis*-uitgawes is reeds ingeskandeer; daar word op 'n weeklikse basis gewerk aan die inskandering van die oorblywende uitgawes met die gepaardgaande plasing daarvan op die webwerf. Die vrywillige hulp van br W Swanepoel (GK Wilropark) in hierdie verband is onontbeerlik.

- 4.3.4 Reeds ingeskandeerde *Quo Vadis*-uitgawes wat in pdf-formaat toeganklik is, word nog deur die Deputate beoordeel (kyk Aanvullende Rapport).
- 4.3.5 'n Toepaslike skakel is na die reeds ingeskandeerde *Quo Vadis*-uitgawes op die webwerf geskep (kyk 4.2.4 hierbo). Hier moet die hulp van ds Hennie van Wyk vermeld word.
- 4.3.6 'n Besluit moet nog geneem word oor die identifisering en herwinning van beskadigde en ontbrekende eksemplare wat nie ingeskandeer kan word nie (vgl Aanvullende Rapport).

Besluit: Kennis geneem van 4.3.1 tot 4.3.6. Die Sinode spreek sy dank uit teenoor br W Swanepoel (GK Wilropark) vir sy hulp met die plasing van die *Quo Vadis* op die webwerf.

4.4 *Rendre Compte de l'Espérance* (deur ds E Kayayan)

- 4.4.1 Die Deputate het besluit om die publikasie van *Rendre Compte de l'Espérance (Om Rekening van die Hoop te Gee)* – gemik op die Franssprekende mark – deur ds E Kayayan, GK Rietvallei, finansieel vanuit die Evangeliseringsmediafonds te ondersteun.
- 4.4.2 Die publikasie is vir die Franse mark bedoel, met die afgelope klompie jaar van ds Kayayan se sendingaktiwiteite in Franssprekende Afrika asook in Frankryk, Kanada e.v. wat daarin neerslag vind.
- 4.4.3 'n Aantal eksemplare van hierdie boek sal by die Administratiewe Buro te koop beskikbaar wees. Erkenning word in die boek se voorwoord aan die Deputate gegee vir hierdie ondersteuning.

Besluit: Kennis geneem van 4.4.1 tot 4.4.3.

4.5 *Brood vir die lewe*

4.5.1 Vertaling in Engels

- 4.5.1.1 Die Engelse vertaling van *Brood vir die lewe* deur br Van Emmenis (GK Randburg) is afgehandel.
- 4.5.1.2 Dit is by die Administratiewe Buro op aanvraag in ringbandformaat beskikbaar.

4.5.2 Vertaling in Setswana

- 4.5.2.1 Die vertaling deur prof Nols Swanepoel van *Brood vir die lewe* in Setswana is ook afgehandel.
- 4.5.2.2 Dit is ook op aanvraag by die Administratiewe Buro in ringbandformaat beskikbaar.

Besluit: Kennis geneem van 4.5.1 tot 4.5.2.2.

5. Aanbevelings

In die lig daarvan dat heelwat sake nog in 'n proses van behandeling is, word die aanbevelings in die Aanvullende Rapport hanteer.

Besluit: Kennis geneem.

F. AANVULLENDE RAPPORT

1. Formeel

1.1 *Aanvullende Rapport*

In aansluiting by bepaalde sake wat nog nie afgehandel was of afgehandel kon wees met die aanbod van die Rapport nie, word hierdie Aanvullende Rapport ingedien. Dit is dus slegs aanvullend tot die Rapport en moet saam met die Rapport gelees word, nie as selfstandige Rapport nie. Tydens die Sinode self kan verdere toeligting oor bepaalde sake wat nog in 'n proses van hantering is gegee word.

1.2 *Fondse*

- 1.2.1 Daar word bevestig dat die finansiële state van die onderskeie fondse van die Deputate Publikasies, ingesluit by die verslag van ander state wat deur die Administratiewe Buro bestuur word (vgl Rapport, 1.3.2), ook saam met die Administratiewe Buro se finansiële verslag hanteer sal word.
- 1.2.2 Daar is tans meer potensiële publikasies wat ooreenkomstig die doelstellings van die CJBF meriete het om gepubliseer te kan word, as waarvoor die CJBF fondse beskikbaar het. Kommer is geopper oor die vraag waar die CJBF vorentoe

genoegsame fondse sal verkry om die gewaardeerde en onontbeerlike werk van die afgelope 100 jaar voort te kan sit.

- 1.2.3 In die lig van 1.2.2 word aanbeveel dat die taak aan die te benoemde Deputate opgedra word om 'n strategie/plan te ontwerp en te implementeer waarvolgens fondse vir die CJBF (al drie fondse by Deputate Publikasies) gegeneer kan word, sodat verdere projekte wat meriete het, aangepak en afgehandel kan word.

Besluit: Kennis geneem van 1.1 tot 1.2.3.

2. CALVYN-JUBILEUMBOEKEFONDS (CJBF)

2.1 Voorrade: CJBF

Br Hannes Vorster van die Administratiewe Buro sal die stand van voorrade tydens die Sinode beskikbaar hê.

Besluit: Kennis geneem.

2.2 Individuele projekte van die CJBF in die termyn 2006-2009

2.2.1 Psalmboek: Publikasie van die 6de Hersiene Uitgawe van die Psalmboek

In aansluiting by die Rapport (2.3.1.1) kan hier rapporteer word dat die redaksionele werk aan die Psalmboek (nuwe redaksionele hersiening van die 2000-Psalmboek) voltooiing nader; die wile is aan die rol vir die druk daarvan. Die Deputate is onder die indruk van die dringende navraag vir die Psalmboek. Die onvoorsiene oponthoude wat met die finale setwerk van die musieknotasie en met die beskikbaarheid van papier vir die druk daarvan opgeduik het, kon deur die Deputate aangespreek word. Die papier is bestel en betaal en na alle verwagting sal die Psalmboek in die eerste kwartaal van 2009 beskikbaar wees. Daar kan met dankbaarheid daarvan kennis geneem word dat die uitgee van die Psalmboek hom dus in die finale fase bevind. (Vgl. die briewe deur die voorsitter van die Deputate wat in Mei en November 2008 aan die kerke gestuur is.)

2.2.2 Elektroniese weergawe van die Psalmboek vir gebruik in kerke (vgl Rapport 2.3.1.4)

- 2.2.2.1 In aansluiting by die aanbeveling van die Rapport (2.3.1.4.1.4) dat Sinode 2009 hierdie saak as opdrag vir die volgende Deputate laat kontinueer, met inagnome van betrokke finansiële en juridiese aspekte sowel as van die werk wat reeds in hierdie verband gedoen is, word die volgende aanvullende aanbevelings gemaak:

Besluit: Kennis geneem van 2.2.1 tot 2.2.2.1.

- 2.2.2.1.1 In plaas daarvan om verder met 'n nuwe projek vir 'n elektroniese weergawe van die Psalmboek vir gebruik in die kerke voort te gaan en in die lig van ondersoek in hierdie verband (vgl Notule 11-09-2008, 7.1.5.3.1) beveel die Deputate aan dat die volgende Deputate die bestaande CD met elektroniese Psalmboek deur die Administratiewe Buro laat standaardiseer en wel op die volgende wyse:

2.2.2.1.1.1 deur die CD by die oorspronklike samesteller te verkry

2.2.2.1.1.2 om dit aan die hand van die nuwe redaksiewerk aan die Psalmboek te kontroleer en aan die kerke beskikbaar te stel.

2.2.2.1.2 In die lig van die mededeling dat die APK in hulle gebruik van die Psalms wysigings aan die teks van die berymde Psalms (1937) sou aangebring het (vgl Notule 11-09-2008, 7.1.5.3.1.4), word aanbeveel dat inligting ingewin word oor die omvang en aard ens, daarvan met die moontlikheid om die saak vir advies na die Regsdeputate te verwys.

Besluit: Goedgekeur.

2.2.2.2 Die indeks met kruisverwysings na beide stelle nommers van die Skrifberymings (die een stel soos in die 2000-Psalmboek en ooreenkomstig die Sinodebesluite en die ander stel soos in die bestaande 2003-Psalmboek) in die vorm van 'n boekmerkie word hanteer sodra die publikasie van die 6de Hersiene Uitgawe van die Psalmboek afgehandel is (kyk 2.2.1 hierbo).

Besluit: Kennis geneem. Kyk ook besluit by Deputate Liturgiese Sake [22.1].

2.2.3 1559-Institusie van Calvyn in Afrikaans – Simpsonvertaling

2.2.3.1 Ná die indien van die Rapport en ná die laaste vergadering van die Deputate is daar opnuut – met nuwe tegniese inligting tot ons beskikking – indringend

- ondersoek ingestel oor moontlikhede waarop die meester van die eerste uitgawe van die Afrikaanse vertaling (Simpson-vertaling) van Calvyn se *Institusie* elektronies herwin kan word (vgl Rapport 2.3.2.1.9). In hierdie verband was brs Willem Swanepoel en Werner Simpson met hulle tegniese kennis baie behulpsaam en 'n weg is gevind waarop die meester wel elektronies beskikbaar gemaak kan word. Enkele aspekte is nog hangende – 'n voorlopige afspraak is vir Januarie 2009 gemaak om die laaste struikelblokke uit die weg te ruim sodat die werk aan die meester vir die heruitgawe van die Simpsonvertaling van die 1559-*Institusie* onmiddellik voortgesit kan word. Die teikendatum vir hierdie projek, wat gesamentlik met die IKRS (*Instituut vir Klassieke en Reformatoriese Studies*) aangepak word, is steeds 2009 om met die Calvynjaar saam te val.
- 2.2.3.2 Met die inligting wat op 11-09-2008 tot die Deputate se beskikking was, is besluit dat 1000 eksemplare in sagteband gedruk sal word (vgl Notule 11-09-2008, 7.3.1.1.1).
- 2.2.3.3 Ter wille van finansiële ondersteuning het die Deputate besluit om vennote te soek vir die uitgawe van die *Institusie*. 'n Kommissie is hiervoor in die lewe geroep. 'n Teiken van R120 000 (addisioneel tot die R150 000 uit die CJBF-fonds wat reeds toegeken is) is gestel. Aanvullende mondelinge toeligting kan tydens die Sinode gebied word.
- 2.2.4 Afrikaanse verkorte weergawe van die *Institusie* – Duvenage/LJ du Plessis-uitgawe
Die taalkundige verwerking van die manuskrip vir die heruitgawe daarvan is afgehandel. Finale tegniese aspekte geniet nog aandag, maar die manuskrip bevind hom reeds in die laaste fase van die proses van heruitgawe. Addisionele toeligting kan tydens die Sinode gegee word.
- 2.2.5 Die Woord voor die ja-woord, Afrikaanse vertaling van ds E Brink se boek, *Het Woord vooraf*
Die publikasie van *Die Woord voor die ja-woord*, Afrikaanse vertaling van ds E Brink (Nederland) se boek *Het Woord vooraf*, is nog nie afgehandel nie, maar bevind hom wel tans in 'n gevorderde stadium. Addisionele toeligting kan tydens die Sinode gegee word. (Die kostes vir die uitgee van hierdie publikasie word deur die Evangeliseringsmediafonds gedra.)
- 2.2.6 So bely en leef ons, publikasie met dagstukkies oor Belydenisskrifte, oorspronklik gepubliseer in die 2005-Almanak
- 2.2.6.1 Aanvullend by die Rapport (vgl 2.3.6) kan gerapporteer word dat hierdie publikasie afgehandel is.
- 2.2.6.2 Met waardering kan gerapporteer word dat die Deputate Almanak fondse vir hierdie publikasie beskikbaar gestel het – 'n besondere ondersteuning waarvoor hulle skriftelik bedank is.
- 2.2.6.3 'n Oplaag van 1450 eksemplare is gedruk. Die kleinhandelprys vir die publikasie is R80; die prys aan verskaffers R60 (teen 'n drukkoste van ongeveer R40 en tantieme van R7.50 – 12,5% van R60 – per boek).
- 2.2.6.4 Die opbrengste uit die verkoop van hierdie publikasie word aanvanklik in die CJBF se rekening inbetaal.
- 2.2.6.5 Aan die te benoemde Deputate word die opdrag gegee om oor die aanwending van hierdie bedrag te besin. Die moontlikheid dat dit aan die Dankbaarheidsfonds oorbetaal kan word, kan oorweeg word.
- 2.2.7 “Leer my Heer” – Projek om die sing van Psalms en die Geneefse melodieë, veral onder kinders, te bevorder (vgl Rapport, 2.3.7)
- 2.2.7.1 Die eerste fase, waaronder die opnames van die eerste Psalms, is met welslae afgehandel.
- 2.2.7.2 Daar is van die kant van die Deputate met die produsente samesprekings gehou oor bepaalde aspekte. Volgens die vooruitsigte behoort hierdie projek in die loop van 2009 afgehandel en die produk – waarna met mooi verwagting uitgesien word – dan bemerkbaar te wees.

2.2.8 Calvyn se Kommentaar op Romeine – Afrikaanse vertaling (vgl Rapport 2.3.8)

- 2.2.8.1 Suksesvolle boekbekendstellings is in samewerking met die mede-uitgewer, die IKRS (*Instituut vir Klassieke en Reformatoriese Studies*) in Bloemfontein (3 September 2008 tydens die SA Calvynkongres), Potchefstroom (11 September 2008) en Pretoria (7 Oktober 2008) gehou, waartydens die vertaler, prof Fanus Postma, vir sy reuse werk bedank is, so ook internasionale en Suid-Afrikaanse Calvynnavorsers wie se werk direk/indirek as stimulus gedien het vir die aanpak van hierdie projek. Die familie van wyle prof HW Simpson, vertaler van o.a. die *Institusie*, aan wie se gedagtenis hierdie band opgedra is, is ook erkenning verleen met die bekendstelling. In die proses het die CJBF as mede-uitgewer by die vertalingsprojek positiewe blootstelling in die publiek ontvang.
- 2.2.8.2 Die Deputate het in beginsel 'n besluit geneem om as mede-uitgewer saam met die IKRS (wat die publikasies voorberei) by die verdere publikasie van Calvyn se kommentare betrokke te wees.

Besluit: Kennis geneem van 2.2.3 tot 2.2.8.2.

2.3 *Projekte wat tans in verskillende fases van hantering is en aan die volgende Deputate oorgedra moet word*

Die onderstaande projekte word na die volgende Deputate vir hantering verwys. Dit is projekte wat tans nog in die proses van keuring en/of afronding met die oog op die keuringsproses is en/of op die ys geplaas is totdat die finansiële situasie van die CJBF sodanig is dat dit uitgegee sal kan word (vgl Rapport 2.4) of aansoeke wat weens die feit dat die termyn van die huidige Deputate verstryk het, nie verder hanteer kon word nie:

2.3.1 Johannes Calvyn – 'n Jeugroman deur Jansie van der Walt

- 2.3.1.1 Die Engelse weergawe van hierdie historiese roman (*The Dawn of a New Light – Life Story of John Calvin*) is in 2007 deur die CJBF gepubliseer (vgl Rapport, 2.3.3 – daar word die publikasiedatum verkeerdelik as 2008 aangegee).
- 2.3.1.2 Omdat die Afrikaanse weergawe van hierdie roman (1981 verskyn) uitverkoop is, het die Deputate geoordeel dat dit weer uitgegee behoort te word, veral met die oog op Calvynjaar 2009. Die voorbereidingsproses is ten tye van die skryf van hierdie Rapport nog aan die gang. Tegnieke aspekte geniet nog aandag. Die finale besluit oor die herpublikasie hiervan word egter aan die volgende Deputate oorgedra. Addisionele toeligting kan tydens die Sinode gegee word.
- 2.3.2 'n Uiteensetting van die Dordtse Leerreëls
- 2.3.3 Afrikaanse (Simpson-) vertaling van Calvyn se Kategismus (1542/45). Hierdie boek was oorspronklik deur die PTP (Potchefstroomse Teologiese Publikasies) gepubliseer.
- 2.3.3.1 Die Afrikaanse vertaling van 1542/45 se Geneefse Kategismus is elders reeds elektronies beskikbaar gestel.
- 2.3.3.2 Die besluit oor die herpublikasie van die harde kopie van dié Kategismus word na die volgende Deputate verwys.
- 2.3.4 'n Calvynboek met die oog op die Calvynjaar 2009
'n Aansoek is ontvang dat die CJBF betrokke moet wees by die uitgee van die Afrikaanse vertaling van 'n Calvynboek deur die beroemde Franse Calvynnavorsers, prof Olivier Millet, met die oog op die Calvynjaar 2009, waarin Calvyn se lewe en werk voorgestel word met inagnome van die nuutste internasionale navorsingsresultate. Die Deputate het geoordeel om in beginsel betrokke te wees by die gesprek/projek vir die uitgee van hierdie publikasie.
- 2.3.5 'n Aansoek vir die publikasie van 'n manuskrip wat aan die einde van die termyn op die tafel van die Deputate gekom het. Reëlins vir die keuring daarvan is reeds getref, maar weens beperkte fondse is hierdie aansoek eers op die ys geplaas.

Besluit: Kennis geneem van 2.3.1 tot 2.3.5.

2.4 *Aansoek wat teruggetrek is*

Daar het reeds 'n aansoek vir die publikasie van 'n historiese boek oor GKSA-gemeentes voor die Deputate gedien (vgl Rapport 2.4.2) en tydens die laaste

vergadering van die Deputate (11-09-2008) is 'n besluit geneem hoe die betrokke publikasie, omdat daar tans nie genoegsaam geld beskikbaar is nie, by wyse van voorafbestellings tog hanteer sou kon word. Die Redakteurs van die publikasie het die Deputate egter intussen in kennis gestel dat hulle elders met ondersteuning reggekrom het.

2.5 *Bemaking*

Die uitvoering van die volgende besluite deur die Deputate word aan die te benoemde Deputate oorgedra:

2.5.1 Die bekendstelling van alle CJBF-publikasies en -projekte in soveel as moontlik kerklike en teologiese tydskrifte binnelands sowel as buitelands (bv Nederland).

2.5.2 Die afdrukke van CJBF-publikasies se buiteblaaie op 'n plakkaat vir bemaking in gemeentes en elders.

2.5.3 Die bemaking van nuwe CJBF-publikasies in die GKSA se feeskoerant(-e).

Besluit: Kennis geneem van 2.4 tot 2.5.3.

3. EVANGELISERINGSMEDIA: *Quo vadis*

3.1 Sedert die indien van die Rapport (vgl 4.3) is daar verdere vordering met die elektroniese ontsluiting van vroeëre *Quo Vadis*-uitgawes gemaak.

3.2 'n Aantal van hierdie uitgawes is ook reeds op die GKSA-webwerf toeganklik; die res volg stelselmatig soos wat die broeders betrokke by die webwerf tyd vir die plasing daarvan kan inruim.

3.3 'n Uitvoerige skriftelike Rapport met verwysings na die spesifieke *Quo Vadis*-nommers is ter insae beskikbaar.

Besluit: Kennis geneem van 3.1 tot 3.3.

4. Aanbevelings

Die Sinode wys Deputate aan met die volgende opdragte:

4.1 Voer alle opdragte ooreenkomstig die CJBF se Reglement uit.

4.2 Voer alle opdragte ooreenkomstig die Totius-reglement uit.

4.3 Voer alle opdragte ooreenkomstig die Evangeliseringsmedia se Reglement uit.

4.4 Voer alle opdragte uit ooreenkomstig die aanbevelings soos goedgekeur deur die Sinode ten opsigte van die Rapport sowel as die Aanvullende Rapport van die Deputate Publikasies: CJBF, Kerkorde en Evangeliseringsmedia.

4.5 Die Deputate kry opdrag om saam met die Bestuur van die Admin Buro 'n strategie/plan te ontwerp en te implementeer, waarvolgens fondse vir die CJBF gegenereer kan word, sodat verdere projekte wat meriete het, aangepak en afgehandel kan word (vgl 1.2.3).

4.6 Om die elektroniese weergawe van die Psalmboek vir gebruik in kerke af te rond, af te handel en te bemark.

4.7 Die Deputate doen marknavorsing oor wat die behoefte van lesers (binne en buite kerkverband) is, (bv lektuur vir pastorale behoeftes, Bybelstudies e.a.).

4.8 Die Sinode benoem 'n predikant uit die swart kerke om op die Deputaatskap te dien.

Besluit: Goedgekeur.